

筆記小說大觀

集

清梁恭辰著
北東園筆錄

第五冊

進步書局校印

北

東

園

集

卷

一

上

集

卷

二

下

文闈犯鬼

清 福州梁恭辰撰

文闈中報德報冤之事。前錄已屢載之。余以道光丁酉登鄉薦。本科場中酷熱異常。憶當時三場中所聞士子犯病及犯鬼者不一而足。未暇詳詢原委。近閱修福新編中所載兩條。正是科事。因補錄之。云道光丁酉福建鄉闈訓導某進場次日題紙甫下。即發狂疾。吁曰。十年前鴉片案發矣。語刺刺不休。亦不可辨。旋引小刀自刺其頸。同號驚救。見其神色俱變。兇不可近。血潰不止。須臾氣絕矣。僉謂彼非假公毒害。即襲取非義之財。陷人性命。可知不然。胡必於官府共聞耳目衆著之地。報之如此其烈乎。又云。是科周生某首場甫交卷。纔轉身。忽旋風撲面。遂瞶眊不知所為。平地跌倒。額破血流。衆方扶救。氣已絕矣。按此兩事皆隱其名。而一詳其官。一紀其姓。其非子虛烏有可知也。又按修福新編係近年吾閩泉漳人所輯。不著姓名。敘例中但自稱補過堂而已。所錄皆載本朝可勸可懲之事。中有余所已錄者。其乾隆四十年以前事。亦與余書體例不符。茲就近來數十年節取二十餘條。皆吾閩新事。信而有

徵者分別存之

陳天簡

海澄陳天簡慷慨好施為人傭賃藥材生理其主家亦陳姓富甲一邑乾隆間紳士謀新文廟諸同事以陳某巨富囑天簡向某勸為捐首天簡詢以公酌數應若干眾以千金答天簡即請冊署某名曰諸某某惡其為人誑愚且自專決不坐賬天簡不與較論慨然改署己名自罄物產如數交清遂以第一名勒石是年科試其子入泮明年登賢書羣以為敬聖人之報如此其速然自是家日窘諸富室素耳其為人鳩金四千有奇使為北上復客有汀郡故太守子某扶輿回江蘇沿途或前或後或同止宿由是與天簡相得甚歡某中途忽止其駕天簡問故某以囊金盡告天簡聞言即以黃白湊合四百金付用及抵家邀天簡道謝并還璧始知某為巨富家適京師有庫參三箱發賣民間天簡金本短有憂色某偵知之悉為納財結清天簡束裝至京時參價昂甚爭市之除繳還江蘇某項及諸主家外尚獲利十倍遂暴富現家漳郡城子孫蕃盛同入郡庠食餼者多至百餘人夫敬聖人本萬古同然之理乃一念之真誠食報若此可以勸矣

楊啟元

楊啟元原籍同安人臺灣嘉義學課讀治生。初一寒士耳。嘉慶庚午適重修文廟。元自詣公所。請以是年館金百員悉數捐題。人皆以戲言視之。蓋稔知生本寒素家。不應為是意外之事。且疑其誑也。元以本心告曰。善願由人。曷可拘拘貧富間。眾咸義之。是科秋闈報捷。今年六旬餘。其子經復受知於學使者游邑庠。家計亦漸裕矣。又道光庚寅。彰化重修文廟。梁濟時以重貲倡首。修葺完繕。是年即劉次白觀察主科試時。與其選。先是彰邑揭正場榜。時文以額滿。見遺明日復試時。方喟然不言。而戚友勸慰者。買買然來也。日已西。倏飛報至。一座錯愕。問之。乃知時升補華號。皆為轉喜驚賀。明年辛卯。時中式第五十二名。夫至聖咸知尊敬。然至揮金倡義。則每觀望不前。此關參不破。到底非福人。又何善之能為耶。

踐墳慘報

漳州之鄴山書院。即前明黃石齋先生講學地也。院門前有六堆廢墳。夾襍當衢。乾隆間。掌教黃某子名衍。賦性桀驁。年幾弱冠矣。出入間。以廢墳礙行走。嘗以靴尖踢諸墳上。久之。踐如平地。白骨暴露。一日適友人見之。急以善言勸阻。行稍知悔。無何

歸家娶妻竟不復記憶明年產一男週歲餘其妻又胎孕生男如是連舉六子衍喜若狂及漸次長成日習賭蕩始猶盜取小物賠償戲債繼則搶奪強分無所顧忌行反懼其兇終不敢一言叱責家資破耗殆盡子由是多病亡其存者亦莫知所之矣戚友勸衍螟蛉一子衍泣言從前毀墳夙孽適符六子之數宜受此報養子恐亦無成未幾夫婦相繼歿矣夫無主之墳有力者崇而封之無力者從而掩之乃矜恤同類之道惡可以枯骨無知視若草芥耶卒之我能使鬼一死而再死鬼亦能使人有嗣而絕嗣嗚呼報亦慘矣

犯淫

乾隆末廈門某生籍龍溪者有夙慧品格亦瀟灑不羣同輩咸器重之年十五赴郡應試居停主人柴姓適有僕婦在門前買柴友人戲出對云柴媽買柴大担小担

門地

某應聲曰篋片破篋長拖短拖

皆漳州地名

蓋座中適有慣作中媒者人皆戲呼之

為蔑片因借對嘲之一堂皆為之拍案叫絕是歲即遊庠旋食餼秋闈亦屢膺首薦

三十許歲時忽語人曰余曾淫三妻女兩寡婦天譴將至且生平蚊蠅從不着體今

魔之不去知不能久留矣未幾尋卒因此知風流名士四字之誤人不淺也

不敬天怒

乾隆甲戌臺灣大風瓦屋皆鳴有童兒罵風伯不仁者忽被狂風吹仆神色大變而口眼已歪斜矣叩天謝罪遲久而始如故竊思彗孛飛流日月薄食迅雷烈風怪雲變氣此皆陰陽之精其本在地而上發於天古來天子尚須修德修刑以體天意即聖人亦有必變之文豈微末民人顧可肆其憤罵乎此事人多易忽因謹錄之

楊蔡二封君

南安塘上楊封君值歲饑發粟三千石賑濟子崇澤邑諸生病足幾廢一日封君禱於神乩示一方用羊頭數顆剖開焙熟推捺兩腿上如是三日步履漸復如初是年捷鄉闈旋登進士第授陝西知府孫芳乾隆庚寅舉人芳之孫紹祖道光辛巳舉人同時晉江安海蔡飛鳳之父家不甚豐生平敬師好儒間楊封君事亦慨然以三千石穀助給貧乏時斗米千錢也飛鳳先不能文自是文思大進旋入泮榜姓王子萬青孫日起皆為名諸生

張封君

安溪龜塘鄉張某翁家素封樂善好施乾隆乙卯年大饑貧家鬻子女以易食甚有

絕粒死者某愴然軫懷思一急就計周濟之附近鄉里歡呼共指為續命之田也初諸家禾稼尚介青黃生熟之間惟某一派腴田獨成熟至是分粟諭知約於明日齊赴田間刈穫每人攤分粟十餘斤自行取去鄉人賴此數日糧遂得果腹不死是年其孫際青遂登鄉解

劉巡司

嘉慶初年廈門石滸司劉天祐號蒼來為人仁恕不吝貲財與人談輒以善事相勸勉又精於醫學附近貧民無力療病懇門上傳稟即徒步往視不少緩遇有危證須用參而貧不能備者每以參合藥與之不取直也在任六載如是不倦臨歿前一夕夢一吏責文書來啟視之則天帝嘉其居官好善命作某處土地醒時遂治後事遺諭妻兒畢沐浴更衣而逝數年後有廈民某至石碼會值薄暮見與馬喧闐簇擁一官長注目睇之即巡司劉公也某駭劉公已死趨問從人答曰將到此間赴任矣明日某偶出散步見一廟宇新粧伽藍尊神詢之廟祝言昨宵酉刻始塑此像乃知公又升遷此地矣

不孝罪不在大

嘉慶某年泉州鄉間土人某少失恃父素嚴督不貸令就蒙館近地以獲教學之益娶室後某偶回家父輒促就館某以父命不敢違然心竊竊疑之一夜潛歸漏三下矣值其父忽患嘔痧病披短衣起急扣婦房門思索湯藥某錯愕微窺之見其婦披襲衣啟視父手指口畫無所言某怒以煙筒向父頭上作接擊勢蓋以翁戲婦也及父病旋止自忖涉瓜李嫌不敢言某覺其誤亦不敢言無有知者有錦宅黃生某同研友也一日暴卒其魂已到陰府適閻王升殿傳進跪伏俄聞一吏呈冊云此生未有惡迹數亦未盡王命遣歸方轉身走見某正受炮烙刑黃生訝其死問故某泣言夜間擊父罪故先被拘魂譴責不久當入鬼錄矣黃生驚寤急造其館縷述奇夢某惶恐失措隨以謾告且言由此兩手無故自痛狀踰月竟卒嗟夫父天也獲罪於天豈有生理一過誤間而冥中伺察立至可見為子者罪不在大宜加警省也

淫報

泉州一士人陳姓少年力學頗有文名但生性好淫善諧值州友聚談率以所污婦女穢事藉為博笑之端赴郡祖寓見主人有少艾或中年有姿色者往往不吝貲財賃居其家務遂其欲乃快心焉郡邑試常列前茅及院試日四體若為重物所壓昏

蹟不知所為。或落題字。或墨污卷。或潦草不成文理。以是坐黜。憂忿成疾。嘉慶庚辰上郡應試。甫十日。竟為疫症傳染而死。復蘇。語諸友曰。余素有淫行。以致鬱鬱困鹽車。今復作他鄉之鬼。天道報應。如是不爽言訖。嗚咽而逝。時二十七歲也。經四晝夜。臭不可聞。家人至始為治具焉。

汙辱佛門

廈門庠生楊城。積學士也。嘉慶年間應試秋闈。省場初九夜。方杭坐構思。忽燭影搖紅。幾於撲滅者再。一綽約女僧。揭簾入。攀城肩俯闕曰。誤矣。即抽身去。城駭甚。俄聞鄰號有笑語聲。有啜泣聲。有乞哀聲。既而聞寂若無人。城語衆共趨視之。則某僵卧死矣。度某有淫行。必始亂之。終棄之。以致飲恨九泉。慘報若此。楊生則謂汚衊佛家弟。子世多忽之。豈知為禍尤烈。實不可不深思而炯戒也。姦淫室婢。早有天譴。明條狎暱名娼。不免風流罪過。況玷釋教。破禪規。頓使清淨法門。變作煙花境界。孽由自造。悔其奚追。自愛名流。萬勿謂阿堵通神。何事不可作也。

電震賣豚人

嘉慶年間。永春州有賣小豚者。至一孤村。有婦人以二金買兩豚。已付金。忽聞兒啼。

聲入室抱兒出賣豚者徑去婦追呼曰若取我二金奈何不與我豚其人佯答曰豚兩頭欲賣四金二金不賣也舉步如飛婦追不及路側有水碓即其小姑視舂婦置兒於碓室復追之小姑方篩米聞言未及投抱兒爬至碓下舂如泥須臾小姑回視見殘骸委棄狼藉驚悼欲絕哭曰我何以見吾嫂哉遂解繩自縊嫂還方歎恨財物兩失忽見兒死碓下小姑懸梁上驚地不知其由亦縊於碓室賣豚者行未數里白日無雲為迅雷震死矣

不孝極惡

廈門道署有一客陳某暴厲居心而善權子母一出十償以是成家有老母年五十餘某叱咤指使若奴隸然稍不如意輒罵詈百出不可名狀母泣然背泣者屢矣鄰友聞之為諷刺曰為母也子者顧如是乎哉某不答仍訑訑不為怪一日有事晏歸腹怒如供食稍遲怒目側視厲聲曰炊一頓飯尚不能不死何為言訖忽天黑風雨驟至一聲霹靂聞者胆碎而某已震死面有小字云不孝極惡之報此道光八年四月事也夫孝可格天則不孝斷不能逭天怒況如此極惡乎

厚殮禍

廈門蔡某專以掘墓為生久之仍不見敗露一夜發林家墳鑿空棺頭伸手入搜首飾等物忽被鬼攝迷手節任拔不出天明喧傳聚觀者皆歎為陰魂有靈地保稟官詣視救醒後拷掠備至諸罪盡服乃削十字十架插大道之側令某昂立其中兩手分開鎖住示眾不准人給湯飯一晝夜叫號而死此道光庚寅年事也補過堂主人云余每怪富厚之家殮親時輒以珍珠美玉及金寶重器為殉以為如是乃盡子之心也吾則謂適以貽親之累耳何也彼重物殉葬之家戚屬則觸目生心奸民則聞風思逞即不然保無不肖子姪發塚自盜者乎致使山靈走氣骸骨亂次死者隱抱再死之痛此罪將誰歸也後周太祖遺囑以布衣葬後梁唐晉漢諸陵皆被盜發而太祖安堵無恙然則後人當知所法矣按浦俗屢因厚殮而致毀棺家大人曾有戒厚殮說余於前錄中已詳言之此條慮及不肖子姪發塚自盜之事前錄中未詳載其事然則掘墓者固罪不容誅而厚殮者自為厲階其罪尤大自古及今數不孝之尤者舍是將誰屬乎

吳元長

門吳元長家巨富告貸者有求輒應或百金或數百金積券盈篋適病間默思勞

勞計較將為子孫福。適為子孫禍。爰召逋債之家詣視焚券。示不責償也。捐資數千充入浯江書院。東修薪水生童膏火之費。皆取資焉。是年開期第一課。為東里子產題及甄別甲乙童卷上。取其長子漪瀾文亦與焉。道光庚寅歲。瀾赴郡應院試。恰是書院開課題。瀾恍惚神助。一揮而就。遂以是獲雋入邑庠。蓋利物修福非如此顯示果報不見造物之奇也。

惡念喪身

廈門蓮坂鄉某者。年二十二。性謹厚。力穡人也。門口一井。出泉不涸。鄉人待食此井者數十家。道光丙申。天不雨。幾九閱月。聚汲益夥。某厭其喧呶。疊次哄阻。眾皆以水火細故。不與辨。亦不怪也。貿貿然往來如故。某倏生惡念。將牛糞暗施井中。蓋使食者惡此味而 he 取也。明日潮退時。族中二人招某赴海同漁。忽平地起雷。擊某死。而同伴俱無恙。一念之毒。即禍及身。吁可畏哉。

楊宗潮

同安諸生楊宗潮。為人誠篤可風。尤惓惓誘進後輩。一時遊庠食餼者多出其門。同里有曾姓名德基者。家極富而性嗜學。楊一見物色之。遂招入館中。受業資以衣食。

俾得肆力文章。由是學業日進。遂入南靖邑庠。旋登道光乙酉拔萃科。迨廷試。考授儒學。皆謂楊公相士有識云。晚年上郡渡江時。有某溺水。楊疾呼曰。若救得此人。謝銀四元。衆爭救之。某得不死。一日病篤時。年六旬矣。夢人冥遇一判官。謂楊曰。汝壽數應盡。幸有陰德可救。即以冊子付閱。見己名下硃書云。曾救一人。增壽一紀。閱完。被判官一推而寤。病漸瘳。後果如數。善終。

不敬字迹二事

安溪李家婦某氏某翁。為邑諸生。去世已久。家中書籍盈架。氏生兒甫週歲。每值兒下便。即折冊頁拭穢。一夜適夫他往。氏閉戶睡醒。失兒所在。欲起尋覓。忽被雷震死。明日族人出操作。路經氏門。見呱呱小兒。知為氏子。不解何故。擲置門外。遂抱入懷。及日卓午。門仍緊閉。不聞人聲。衆破門入。驚視冊頁成堆。皆沾穢物。氏尸在焉。每怪世人拋棄字紙。輒自解曰。我非讀書家。遂至踐踏無忌。上干天怒。如氏者可勝道哉。不知朝廷非字道不尊。官吏非字事不治。士民非字名利不成。振古如斯。其所維繫者甚大。而其理甚明也。是故天下不可一人不識字。即不可一日不敬字。又道光十三年二月初三日。同安洋宅陳姓者。累日賭輸。移怒賭具之害。盡投糞缸中。薄暮

某還過其地。心頭一悚。被雷打死。并碎其缸。無一人知者。是夜大雨傾盆。漂盡污穢。及天明。眾視某尸橫地。見賭具尚在破缸之底。紙牌葉葉可數。方悟為不敬字迹之報也。

慢神

臺灣鹿港監生林某。富累萬金。生性嗜賭。暇時輒攜數百金入賭場。金盡乃已。繼見累次失利。每欲出門。必默禱家中神明。然仍賭輸如故。數年間黃白物已幾幾乎罄矣。忿恨禱祝無靈。將供奉諸神金身持斧斫碎。由是妻兒相繼病故。奴婢多辭去。一日下鄉收租。因索租太急。被佃戶某冷語相侵。怏怏而歸。越數日某佃將至林家謝罪。而林某適遇諸塗。恍惚間見某佃率十餘人手執兇器。不可迫視。疑某糾眾殺己。急拔小腰刀向某佃當胸一刺。某佃不及防。即仆地死。林睜目諦視。竟杳無一人。始知為鬼物播弄。然悔無及矣。隣右恐相累。扭送地方官。至今繫獄候決。此可為慢神者戒也。

李寡婦

同安李姓寡婦某氏。家富累萬金。性喜施濟。而勤儉有度。常端坐詞色無所假。失所

天時兒纔生閱月及長娶室次年弄孫氏始有喜色時氏四旬矣一日蚤起觸見族人某潛蹤內庭蓋某饑寒迫體冀以剝取儲粟也氏驚愕叱問某始而愧慙繼以實告氏心戚之有留為供役意因與語某辭曰幸蒙宥罪茲復畀我生路焉敢方命但某壯歲鰥夫也倘日近侍婢有不可言處某有虧行累爾亦蒙不白之名氏憬然為改容即命某出明日遣其子往贈二十金勸其營為正業某果赴廈門置貨度洋其地適值瘟疫諸夥折本求售某獨以藥材擡估及黎棗什物多爭購之獲利無算而歸遂造室往謝氏時氏六十餘矣臨終顧子婦曰寡守三戒一不可令外戚出入次不可畜奴僕三不可自暇逸遊寺觀汝曹共傳之斯言簡而切中有關世教故備錄之夫全人名節祇此防微一念然則某有善心應享善報而氏亦女中人傑哉

劫盜還債

泉州郡城外陳地鄉丁某貧無立錫娶妻某氏入門一見其夫便股慄不自禁有是語意稍拂某輒加杖責怒時即持白刃刺氏膚血濺衣乃已及連產四子仍如是不少貸氏病骨奄奄而目若鬼然終無怨心日事紡織供朝夕一日有友來招某渡洋經商某諾之並不告辭妻子出門徑去後氏經紀彌勤家計漸豐先是某有屋後隙

地富人以百金購求氏得金營運生息垂二十餘年遂成富室道光壬午歲某忽歸家見舊宅輪奐一新心駭不敢前適有族人識某音容報知伊子趨迎時氏已故子皆成立有室矣各命其婦出拜翁某問其致富原由子具道起家情事并其母勤儉苦況某淒然感泣思再見氏而不可得聞張天師知冥事即日具裝自往廣信府拜懇天師縷述乞見故妻苦哀天師許來日當相見且囑令勿怖明日引入暗室見一黑面大漢執刀怒視大喝一聲某愕然仆地衆扶出醒後以為所見非所願也天師笑曰不差即是人也汝前世販布為生路過山東被一響馬劫殺盜即爾妻也今生耐苦還債自是定理爾亦徒多此一見耳某乃大悟果報所由來回家遂不復介意矣

陳茂才

同安陳某肆力文章而屢困不售赴郡試時友人招飲娼家見一及笄女子舉止端方非復妖冶伎倆某怪問至再女始答以家貧十歲為母鬻身此地今七載矣某詰曰此間樂乎抑從良樂乎女泣視不語某惻然自維無力爰歸謀諸友鳩集身價五十金贖女還囑令其母嫁之母乃招壻贅其家是年某入院試入場假寤見黃髮老